

**Arab Saudi Kagum Kemajuan Ekonomi, Politik Malaysia
Bernama
24 November , 2011**

KUALA LUMPUR, 24 Nov (Bernama) -- Menteri Kebudayaan dan Penerangan Arab Saudi Dr Abdulaziz bin Mohieddin Khojah kagum dengan pencapaian Malaysia dalam bidang ekonomi dan kestabilan politik, yang katanya hasil daripada kebijaksanaan dan dasar sederhana Perdana Menteri Datuk Seri Najib Tun Razak.

Beliau menyatakan demikian pada pertemuan dengan Duta Besar Malaysia ke Arab Saudi Omar Al-Saqqaf di Riyadh pada Rabu, lapor agensi berita nasional negara itu Saudi Press Agency (SPA).

SPA berkata Dr Abdulaziz juga memuji peranan penting syarikat Saudi yang melabur di Malaysia, terutama dalam bidang telekomunikasi dan industri petroleum.

Beliau menyebut tentang peranan penting Saudi Telecom, Petro Saudi dan syarikat lain serta hubungan erat antara dua negara Islam itu.

Omar pula bercakap tentang kejayaan musim haji tahun ini, khususnya hasil daripada peranan penting yang dimainkan Arab Saudi dalam memberi perkhidmatan kepada jemaah.

Beliau juga amat menghargai hubungan erat Saudi-Malaysia dan berkata Malaysia menyanjung tinggi peranan Arab Saudi dalam bidang politik ke arah memelihara keselamatan dan kestabilan antarabangsa.

SPA melaporkan bahawa Omar mempelawa ahli perniagaan Arab Saudi melabur di Malaysia.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=629610>